



The Holy See

IOANNES PP. XXIII

EPISTULA AD IACOBUM

TIT. S. MARIAE IN TRANSPONTINA

S. R. E. PRESB. CARDINALEM LERCARO,

ARCHIEPISCOPUM BONONIENSEM,

QUINTO SAECULO VOLVENTE

A PIO S. CATHARINAE DE' VIGRI OBITU BENE OMNATIS* *Dilecte Fili Noster,*

salutem et Apostolicam Benedictionem. Bene ominatis verbis et salutaribus precationibus id valde optamus, ut ea, quae accurate instauras, sacra sollemnia ad recolenda quinque completa saecula, postquam S. Catharina de' Vigri e terrestri vita ad supernas sedes migravit, felicem gerant cursum et uberes nec labiles pietatis fructus edant. Religionis studium, quo, a maioribus accepto ac diligenter servato, Bononienses Sanctam Catharinam colunt — hanc per antonomasiā Sanctam vocare consueverunt — vividius et vehementius flammescet, cum, prout saecularis peragenda memoria poscet, virtutes, opera, merita recensebuntur sacrae virginis, quae Bononiae, altricis generosae indolis hominum, columen et decus est inclitum. Una simul flagrantioribus votis eius patrocinium impetrabitur, ut, quemadmodum transactis evenit aetatibus, ea fido tutamine tegat, bona ope sospitet urbem non uno ex titulo suam. Quamvis profecto Ferraria, ubi sancta caelestis educata fuit et religiosam vitam capessivit, iure merito ipsius nomine collustretur, tamen potissimum Bononia repetit sibi eiusdem gloriam, praesentiam, tutelam. Enimvero istic nata est; istic prima antistita coenobio sanctimonialium clararium a Corpore Domini moderata est; istic ascensiones in corde suo disponens (1), de virtute in virtutem ad celos vertices scandit, nacta spectatissima mystica dona, non sine labore et dolore et aerumna: fuit enim « peritissima militiae interioris magistra » (2). Asceticis quoque exaratis libris, eruditivit alios ad iustitiam et, ne praeclarae menti quidquam laudis deesset, liberales etiam artes tractavit, plane vereque versatilis ingenii istorum civium exemplum. Sanctae Catharinae pulchre apteque accommodatur honoris praeconium, quo S. Cyprianus sacras virgines extollit: « Flos ecclesiastici germinis, decus et ornamentum gratiae spiritalis ... Dei imago respondens ad sanctimoniam Domini » (3). Ex animo vota facimus, ut opportuna, quae apparatur, celebratio, sublimi quodam in loco ponens istam rari exempli virginem, ac longe lateque spargens tam suaveolentis lilii fragrantiam, quam plurimos ad christiana disciplinae sanctimoniam perducat et ad sectandam iustitiam, pietatem, fidem certatim permoveat. Enimvero in honorandis sanctis caelitibus hoc antecellit et praestat, ut in eorum imitationem laeti vestigia feramus. Quodsi id contigerit, S. Catharina benevolentiore usque vultu Bononienses suos respectabit, et a Deo iis auxilia et solacia praezentissima deprecabitur, ut sanctis gaudiis statae celebritates florent et sui recordationem linquunt durabilem ac suavem. Haec amantibus verbis ominati, tibi, Dilecte Fili Noster, franciscalibus sodalibus, clero populoque tuis curis commisso, qui S. Catharinae Bononiensis quinque saecula ab eius natali revoluta celebrabitis, Apostolicam Benedictionem, superni praesidiī

auspicem, per amanter impertimus. *Datum Romae, apud Sanctum Petrum, die XIII mensis Februarii anno MCMLXIII,*
Pontificatus Nostri quinto. IOANNES PP.

XXIII

*A.A.S., vol. LV (1963), n. 4, pp. 228-229.(1) Cfr. *Ps. 83, 6.*(2) C. Mansueti de Monte Carlo, *Vita altera*, I, 6.(3) *De habitu virginum*, 3.
